

Octavia le ditsala tse 8

E kwadilwe ke Jacqui L'Ange

E tshwantshitswe ke Julie Smith-Belton



Octavia wa Okothophase o ne a dula mo sekgweng sa moferowatle, mo metsing a a tsiditsana a a itshekileng mo molelwaneng wa losi lwa Aforika.

Mo motshegareng o ne a tswa mo logageng lwa gagwe lwa mafika mme a kokobala mo gare ga matlhare a maleele mme a tshamekele mo marannyeng a letsatsi a a phunyeleditseng go tswa kwa godimo.

Go ne go na le dikgopana tse di phatshimang tsa mebalabala mo bodilong jwa motlhaba, le magaga a a bopegileng bontle go ka iphitlha. Octavia o ne a rata tshingwana ya gagwe, gonne o ne a na le matlhajana a a kgethegileng – o ne a kgona go fetola mmala go tshwanelana le se a ka tswang a dutse mo go sona. Gape o ne a kgona go fetola letlalo la gagwe go nna magwatata jaaka matlapa, kgotsa motsu jaaka kgopana.

Se se ne se dira gore a bo a itse go tshameka motshameko wa maiphithwa-phitlhwane thata gonne ditsala tsa gagwe di ne di sa kgone go mmona! Nakonngwe o ne a iphitlha tota moo ditsala tsa gagwe di neng di itlhoboga mme di tsamaye.

Mme e re go ntse jalo, ba bone fela a ba setse morago a itaya metsi ka sehuba.

Fela o ne a tlhola a ema fa a fitlha mo šelofong ya lewatle.

Mo ke moo e leng botennye jwa boalowatle moo go leng lefifi la mma ntshwarele ngwana. Octavia o ne a boifa go fitlha foo.

“Ke rata moo nka kgonang go itshwarelela ka sengwe gona,” a itsise ditsala tsa gagwe tse 8 tsa tlhogo ya kgomo.

“A re tsamaye fela go se nene,” ditsala tsa gagwe tsa fetola, “mme re tlaa boa.”



Ga ba a ka ba kgona go raela Octavia go ya le bona koo morago ga go leka go bua le ena ka seo. O ne a ba leta mo losing lwa šelofo, a lebeletse bontshonthso jo bo kwa tennyanateng go fitlhelela a bona mebala ya bona e e phatshimang e runya mo lefifing leo.

Ya re letsatsi lengwe go le matsubutsubu, metsi a ne a šakgetse e le ruri. Makhubu a masweu mo boalong le makhubu a a ka fa tlase ga metsi a kgoromeletsa ditlhaga tsa lewatle kwa le kwa, le go bintsha dimela tsa anemone.

Octavia o ne a ya go batla ditsala tsa gagwe gaufi le šelofo ya lewatle – mme a tsewa ke metsi!

Makhubu a mo kgarakgatsha. Fa a ntse a kgaratlha jalo, a tshogile, Octavia a kgwa enke e ntsho. Jaanong o ne a sa bone le fa e le sepe – fela o ne a ntse a pitikologa jalo a wa. Dipelo tsotlhe tsa gagwe ka boraro di ne di beletsa ka mosito o mogolo, mme e bile e ne e kete mpa ya gagwe e ne e tlhanologile.

“Thusang!” a goeletsa.



Mo lefifing, a utlwa sengwe se tshwara ka nngwe ya dikgwage tsa gagwe. E ne e obegile fela e le borethe.

“Ke go tshwere!” ga bua Khalo wa lekakauwe.

“Le nna!” ga bua Stella wa tlhapinaledi, a kgomaretsa letsogo la gagwe le le motsu go sekgwage se sengwe.

“Le nna!” ga bua jalo PJ wa pijamašaka.

Ditsala tsa gagwe di ne tsa tswa mo lefifing leo ka bongwe ka bongwe mme tsala e nngwe le e nngwe ya mo tshwara ka sekgwage. Octavia a simolola go tsepama. A itshwarelela thata mme a ba letla go mo kaela kwa tshingwana ya gagwe e leng gona.

Ya re ba fitlha mo tulong e e siameng, Ray a tsharolola difine tsa gagwe go ba sireletsa kgatlhanong le matsubutsubu mme botlhe ba itumelela go nna mmogo gape.

Jaanong o ne o ka se lemoge moo tsala e nngwe e simolotseng le moo ba bangwe ba feleleditseng ka ntlha ya matlhale a a kgethegileng a ga Octavia!



Octavia le ditsala tse 8

E kwadilwe ke Jacqui L'Ange • E tshwantshitswe ke Julie Smith-Belton

Megopolo e re ka buang ka yona

Octavia o ne a tshaba go ela kgakajana le lotshitshi lwa lewatle. Ke eng se o se tshabang? Ke eng se o ka se dirang gore o ikutlwe botoka fa o utlwa o tshaba? Tsweetswee re bolelele ka nako nngwe ya fa o ne o tshaba mme o ne wa thusiwa ke mongwe kgotsa ke sengwe.



Se se bonwang ka matlho

Ya kwa tsebenng ya tiro fano: <https://nalibali.org/story-supplies/activity-sheets>
Dirisa setshwantsho sa bofelo mo leinaneng leno go go thusa go tshasa mebala mo ditsaleng tsa ga Octavia.



Go Bala

Bala leinane leno gape o bo o dira lenaane la dilo tsotlhe tse di fitlhelwang mo lewatleng.




Go Kwala

Dira buka e e sa kwalelang sepe e e bopegileng jaaka tlhapi kgotsa o kope mogolo mongwe go go direla yone. Kwala leinane o bo o dire ditshwantsho ka botshelo mo lewatleng mo bukeng eno. Kgotsa dira setshwantsho o bo o kope mongwe yo mogolo go kwala mafoko a o mmolelelang one.



Botaki

Penta karolo e e kafa teng ya lebokoso botala jwa loapi o bo o itlhamela ditshedinyana tsa mo metsing o dirisa dikgapetla tsa mo lewatleng, matlapa a mannye a a mo metsing, le ditshedi tse dingwe le dijalo tsa mo lewatleng tse o di dirileng ka dilo tse di latlhlilweng le dipampiri tse di pentilweng ka mebala e e farologaneng.



Tiragatso

Dira jaaka e kete wena o setshedi kgotsa sejalo sa mo lewatleng: temeka jaaka sejalo sa kelp, thuma jaaka tlhapi e nnye, thuma jaaka tlhapi e kgolo, tsamaya ka lekeke jaaka lekakaie o bo o lelemele mo metsing jaaka okothophase.

